

FORESCJ DI CULÌ

O si vin domandât plui di une volte cemût mai che la popolazion furlane di cumò, dal alt al bas, e mostre di interessâsi cussì pôc dal distìn de sô tiare, massime in chesc' momenz che dut il nestri doman al è par ajar e che cun tun fregul di buine volontât e di spirit sveât si podares fâ plui di un pôc par pleâlu a vantaç di duc'.

Al è vêr che son in bon numar i furlans che pensin e che fevelin cun passion e cun inteligjenze di cuistion autonomistichis, de pussibilitât e dai miez par meti un pôc in sest la nestre pusizion sedi in riuart al guviâr di Rome, sedi in riuart a Triest e a la Sclavanie, sedi ancje in riuart 'e ricostruzion economiche de regjon. Ma pensâ e fevelâ al zove pôc, se dopo si lasse che fasin dut cheâtris e si cjape ce ch'al ven su pe schene cun tune alçade di spalis. Une volte che a Rome o a Parigj o a cjadalgjaul il nestri distin pulitic al sarà segnât, o scugnarin adatâsi a sapuartâlu, chest distin, cui sa par cetanc' agns. E scugnarân 'sapuartâlu ancje i nestris fîs e magari ancje i nestris nevôz, molant cualchi maludizion 'e memorie dai paris e dai nonos bogns di nuje.

Ma par vê la spiegazion di cheste apatie, baste dâ une cjalade 'es cronicutis locâls dai nestris sfueis, là che tal grum de soçarie, si cjate une vore di foresc', ma ancje une vore di furlans. E dute cheste int, cun tante âtre di chê stesse clape, che rive adore di fâle francje cu la polizie, dute cheste robate che vîf e che si sglonfe il tacuìn cui cuintribanz, cui trafics ilegâi, cu lis rapinis, cui trucs, cui inbrois, cu lis putanariis, ce oléso che ur inpuarti de Furlanie, de autonomie e di dutis lis monadis di cheste fate? Se mai ur inpuarte che nissune autoritât e nissun guviâr nol rivi adore di meti un fren al disordin: ur inpuarte che il turbit al duri par sinpri par podê ancjmò pescjâ dentri. E chesc' galanzumins no son pôs: 'e son un biel grum - magari cussì no - ce plui ce mancûl delicuenz, ce plui ce mancûl cence scrupui, ce plui ce mancûl svelz; e un atri biel grum 'e son chêi che ur tegnin man o che, pôc o trop, 'e rumiin di chel tresêf.

Dute cheste int, par nó no jè furlane ancje se jè notade sui libris des nassitis in Cumune ancje se fevele furlan spacât; e jè int che à rineade la sô tiare, il sô sanc, la sô parentât, la sô cussienze e l'onestat dal so popul, par amôr dai bêz o dal fum o de panze. Par nô chesc' 'e son foresc' tanche l'ultin sarasin ch'al sune la bulziche su lis croseris o l'ultin cosac, vanzum di vuere, ch'al va ancjmò atôr pescjant la tiare dai nestris paris.

(tírât fûr de «Patrie dal Friûl» dal 1 di setenbar dal 1946)